

PREDRAMAZANSKE AKTIVNOSTI VIJEĆA ŽENA



Iftar povodom Lejle-i-Regaiba

Džamije su Allahove kuće, pa se vjernik u njima uvijek osjeća ushićeno, zadovoljno i bogobojaznošću ispunjeno. No onaj, tko se u četvrtak, 09.06. 2011.god., na sedmi redžeb, u akšamski vakat zatekao u Zagrebačkoj džamiji, mogao je doživjeti mnoge čari, ljepote i blagodati našeg dini-islama. Kao rijetko kada, na akšam-namazu, dominiraše naše hanume -vrijedne i drage džematlijeke, koje su postom obilježile još jedan muberek dan mjeseca redžeba. Napola osvjetljena džamija, nurla lica i kićena odjeća naših hanuma u džematu, učenje ašereta – nikoga ne ostaviše ravnodušnim! Zajedničkim iftarom u restoranu Islamskog centra, potom vazuu nasihatom i kraćim druženjem u divanhani, osvježiše svoje znanje o fadiletima Lejle-i-regaiba i blagodatima mjeseca redžeba koje se vjericima, a napose postačima, obećavaju.

Da nam dragi Allah ukabuli naše ibadete i ovakva i slična okupljanja ubroji u dobra i korisna djela.

Allahumme barik lena fi redžebe ve ša'bane ve belligna ramadan!



Sijelo zahvale

U ranijim brojevima Biltena smo, u više navrata, pisali o akcijama koje Vijeće žena provodi s namjerom obogaćivanja i populariziranja Fonda za pomoć samohranim roditeljima djece koja pohađaju islamski vjeronauk. Tako se uspješno, iz fonda El-Fudul, već drugu godinu, pomaže onima kojima je pomoć najpotrebnija. Upornim zalaganjem i aktivnostima članica Vijeća žena, ali ponajviše dobrim i plemenitim ljudima koji imaju razumijevanja za one koji su uskraćeni za ljubav i pažnju jednog ili oba roditelja, Fond uspijeva prevladati i nadvladati tešku ekonomsku krizu u kojoj se danas nalazimo, te barem djelomično olakšati svakodnevicu i odrastanje naših učenika. Jedna od akcija koja je imala za cilj prikupljanje sredstava za spomenuti Fond, održala se 20.02.2011.god. Bio je to prodajni bazar vrijednih iranskih rukotvorina i tradicionalnih gastronomskih specijaliteta. Bazar je organiziran na inicijativu gđe Batool Sharif Khodaei, supruge veleposlanika IR Iran u Hrvatskoj. Naposljetku su, naše sestre iz Iranskog veleposlanstva, sav prikupljeni iznos od 7000.00 kn donirale našem Fondu. Članice Vijeća žena, predvođene predsjednicom, h. Azra-hanumom Omanović su, što zbog iznimno nesebične geste, što zbog velike uspješnosti ovog Bazara, imale potrebu organizirati zajedničko druženje i sijelo zahvale za sve sudionice ovog Bazara. Organiziranjem sijela, u subotu, 11.06.2011., još jednom se mogla izraziti zahvalnost gđi Batool i njezinim sunarodnjakinjama, ali i članicama zbora Bulbuli, koje su sevdalinkama uljepšale Bazar. Sudionicama su, ispred Vijeća žena, uručene, specijalno za tu prigodu izrađene, zahvalnice, a svi

zajedno smo mogli uživati u kraćem predavanju o vrijednostima učenja i proučavanja Kur'ana, kojim nas je počastila mlada sestra iz Irana. Ugodno druženje, uz ilahije i pokoju sevdalinku, potrajalo je do akšam-namaza.

